



210 Ábyrgðartrygging einstaklinga

VÁTRYGGINGARSKILMÁLAR

1. Lög um vátryggingarsamninga.

- 1.1 Auk skilmála þessara, vátryggingarskírteinis og annarra gagna, sem vátryggingarsamningurinn byggir á, gilda um hann lög nr. (númer) 30/2004 um vátryggingarsamninga.

2. Þeir sem vátryggðir eru.

- 2.1 Vátryggðir eru vátryggingartaki, maki hans eða sá er býr með honum í föstu varanlegu sambandi og ógift börn, enda eigi þessir einstaklingar sameiginlegt lögheimili.

GILDISSVIÐ VÁTRYGGINGARINNAR.

3. Ábyrgð vegna tjóns í einkalífi.

- 3.1 Vátryggt er gegn þeirri skaðabótaskyldu er fellur á vátryggðan sem einstakling, enda sé skaðabótaskyldan bein afleiðing af tjóni á mönnum eða munum (þar með talið fasteignum og dýrum) og ekki víðtækari en venjuleg skaðabótaskylda utan samninga, enda verði líkamstjónið eða skemmdirnar raktar til skyndilegs og óvænts atburðar.
- 3.2 Innan þeirra takmarka, sem áður greinir, vátryggir félagið einnig gegn þeirri skaðabótaskyldu er fellur á hann vegna verka þjónustufólks á heimili hans.

UNDANSKILDAR ÁHÆTTUR.

4. Tjón sem fjölskylda vátryggðs verður fyrir.

- 4.1 Félagið bætir ekki tjón sem fjölskylda vátryggðs verður fyrir. Til fjölskyldu hans teljast maki eða sá er býr með honum í föstu varanlegu sambandi, börn og annað skyldulið, enda eigi þessir aðilar sameiginlegt lögheimili.

5. Tjón vegna atvinnu vátryggðs.

- 5.1 Félagið bætir ekki tjón sem verður vegna atvinnu vátryggðs hvort sem um er að ræða eigin atvinnurekstur eða vinnu í þjónustu hjá öðrum. Með atvinnu er einnig átt við hvers konar aukastörf sem vátryggður vinnur gegn endurgjaldi.

6. Tjón á munum í vörslu vátryggðs og fleira.

- 6.1 Vátryggingin tekur ekki til skemmda á munum eða glötunar muna sem vátryggður hefur að láni, á leigu, til geymslu eða eru af öðrum ástæðum í vörslu hans, þar á meðal muna sem vátryggður hefur tekið í heimildarleysi.

7. Tjón af völdum farartækja og vinnuvéla.

- 7.1 Félagið greiðir ekki skaðabótakröfu sem fellur á vátryggðan sem eiganda eða notanda vélknúins ökutækis, lofffars, skips, báts eða annars farartækis. Sama á við um tjón af völdum jarðvinnslutækja eða annarra stórvirkra vinnuvéla.

8. Tjón vegna byggingarframkvæmda.

- 8.1 Félagið greiðir ekki skaðabótakröfu vegna tjóns sem hlýst við byggingarframkvæmdir eða vinnu við breytingu, endurbætur eða skreytingu fasteignar sem vátryggður á eða notar.

9. Tjón vegna mengunar, raka og fleira.

- 9.1 Vátryggingin tekur ekki til tjóns sem rakið verður til mengunar lofts, jarðar, gróðurs, vatns eða sjávar. Félagið greiðir þó bætur vegna slíks tjóns ef það verður rakið til eins skyndilegs og óvænts atburðar sem ekki má kenna því að vátryggður hefur með ásetningi eða stórkostlegu gáleysi látið hjá líða að fara eftir



210 Ábyrgðartrygging einstaklinga

VÁTRYGGINGARSKILMÁLAR

opinberum fyrirmælum sem á hverjum tíma gilda um mengunarvarnir.

9.2 Félagið bætir ekki tjón sem hlýst af langvarandi raka eða langvarandi vatnsleka.

9.3 Ekki bætist tjón vegna hvers konar líffræðilegra eða efnafræðilegra áhrifa og/eða eitrunar, þar með talið vegna sýkla og veira, af völdum hryðjuverka.

9.4 Vátryggingin tekur ekki til ábyrgðar vegna hvers konar tjóns, beins eða óbeins, sem rekja má til asbests.

10. Tjón á eignum af eldsvoða, reyk, sprengingu og fleira.

10.1 Vátryggingin tekur ekki til tjóns sem hlýst af eldsvoða, vatni vegna slökkvistarfs, reyk, sóti, sprengingu, kjarnorku eða geislavirkum efnum.

11. Undanskilin áhætta sem vátryggja má sérstaklega.

Tjón af völdum fasteignar.

11.1 Félagið greiðir ekki skaðabótakröfu sem fellur á vátryggðan sem eiganda íbúðar, húss eða annarrar fasteignar.

Tjón af völdum báta, skotvopna eða dýra.

11.2 Félagið greiðir ekki skaðabótakröfu sem fellur á vátryggðan vegna tjóns af völdum lystibáts, skotvopns, hests, hunds eða annars dýrs.

12. Tjóni valdið af ásetningi.

12.1 Valdi einhver hinna vátryggðu tjóni af ásetningi ber félagið enga ábyrgð vegna tjónsins.

NÁNARI AFMÖRKUN GILDISSVIÐS VÁTRYGGINGARINNAR.

13. Landfræðileg mörk vátryggingarinnar.

13.1 Vátryggingin nær til skaðabótaskyldu sem fellur á vátryggðan á Íslandi eða á ferðalagi erlendis.

14. Vátryggingartími.

14.1 Komi afleiðingar atviks, sem tjón hefur hlotist af og gerst hefur á vátryggingartímanum, ekki í ljós fyrr en vátryggingin er fallin úr gildi greiðir félagið samt sem áður bætur. Á hinn bóginn greiðir félagið ekki bætur fyrir tjón vegna atviks sem verður áður en vátryggingartími hefst enda þótt tjónið komi ekki í ljós fyrr en á vátryggingartímanum.

VÁTRYGGINGARFJÁRHÆÐ OG EIGIN ÁHÆTTA.

15. Vátryggingarfjárhæð.

15.1 Ábyrgð félagsins vegna hvers einstaks tjónsatviks (vátryggingaratburðar) takmarkast við vátryggingarfjárhæð þá sem tilgreind er í vátryggingarskírteini eða iðgjaldskvittun. Ábyrgð félagsins vegna allra tjónsatvika innan hvers vátryggingarárs (vátryggingartímabils) takmarkast einnig við vátryggingarfjárhæðina.

15.2 Félagið greiðir kostnað sem eðlilegt er að vátryggingartaki stofni til vegna ákvörðunar um skaðabótaskyldu eða bótafjárhæð enda þótt greiðsla félagsins fari af þeim sökum fram úr vátryggingarfjárhæðinni. Sama gildir um vexti sem vátryggingartaki er dæmdur til að greiða af skaðabótakröfu sem vátryggingin tekur til.

15.3 Sé vátryggingarfjárhæðin lægri en dæmdar skaðabætur er félaginu þó aðeins skylt að greiða þann hluta vaxta og kostnaðar er svarar til bótafjárhæðar þeirrar sem henni ber að greiða.

16. Eigin áhætta vátryggðs.

16.1 Af hverju tjóni ber vátryggður sjálfur 10% í eigin áhættu en með lágmarki og hámarki sem getið er í skírteini eða iðgjaldskvittun.



210 Ábyrgðartrygging einstaklinga

VÁTRYGGINGARSKILMÁLAR

- 16.2 Nái höfuðstóll bótakröfu ekki lágmarki eigin áhættu greiðir félagið ekki heldur kostnað þó að krafan og kostnaðurinn samanlagt verði meiri en fjárhæð eigin áhættu.

SKYLDUR VÁTRYGGÐS GAGNVART FÉLAGINU.

17. Svik og rangar upplýsingar.

- 17.1 Hafi vátryggingartaki við gerð eða endurnýjun vátryggingarsamnings sviksamlega eða með öðrum hætti vanrækt skyldu sína til að veita félaginu upplýsingar um atvik sem haft geta þýðingu fyrir mat þess á áhættunni og vátryggingaratburður hefur orðið fellur ábyrgð félagsins niður í heild eða að hluta, sbr. (samanber) 20. gr. (grein) vátryggingarsamningalaga. Rangar og ófullnægjandi upplýsingar veita félaginu enn fremur rétt til að segja vátryggingunni upp, sbr. 21. gr. laganna.
- 17.2 Veiti vátryggður við uppgjör bóta af ásetningi rangar upplýsingar sem hann veit eða má vita að leiða til þess að bætur eru greiddar honum til hagsbóta, sem hann á ekki rétt til, fellur bótaréttur hans niður og félagið getur sagt upp öllum vátryggingarsamningum sínum við vátryggðan eins og nánar greinir í 47. gr. vátryggingarsamningalaga.

18. Ráðstafanir til að afstýra tjóni.

- 18.1 Þegar vátryggingaratburðurinn hefur orðið eða hættu er á því að hann muni bera að höndum ber vátryggðum að reyna að afstýra tjóninu eða draga úr því. Vanræksla í þessu efni getur varðað lækkun eða missi bóta eftir lögum um vátryggingarsamninga.
- 18.2 Vátryggingin nær til tjóns og kostnaðar er vátryggður hefur af ráðstöfunum til að afstýra tjóni, sbr. 38. gr. laga um vátryggingarsamninga.

19. Tilkynning um tjón og ráðstafanir vegna tjóns.

- 19.1 Þegar tjón er orðið skal vátryggður tafarlaust skýra félaginu frá því. Sama gildir er hann fær vitneskju eða grun um að skaðabótakrafa, sem ætla má að vátryggingin nái til, verði gerð á hendur honum. Vanræki vátryggður þetta getur hann misst rétt á hendur félaginu eftir lögum um vátryggingarsamninga.
- 19.2 Ekki má vátryggður viðurkenna bótaskyldu sína eða gera samninga um bætur án samþykkis félagsins, nema hann hafi aðeins gert það sem honum var skylt lögum samkvæmt, er hann greiddi kröfuna eða viðurkenndi réttmæti hennar.

SAMNINGAR VIÐ TJÓNÞOLA.

20. Réttur félagsins til að semja við tjónþola og til útborgunar vátryggingarfjárhæðarinnar.

- 20.1 Félagið á rétt til að annast samninga við tjónþola (þann sem kröfu gerir á hendur vátryggðum) og eftir atvikum að annast málsvörn. Kostnaðinn greiðir félagið eftir reglum 15. gr. skilmálanna.
- 20.2 Félaginu er heimilt að greiða bætur beint til tjónþola. Komi fram skaðabótakrafa getur félagið á hvaða stigi málsins sem er fullnægt skuldbindingum sínum og losnað við frekari greiðslur með því að greiða vátryggingarfjárhæðina og áfallna vexti og kostnað sem svarar til vátryggingarfjárhæðarinnar.

GILDISTÍMI, GREIÐSLA IÐGJALDS OG FLEIRA.

21. Gildistími vátryggingarinnar og uppsögn.

- 21.1 Vátryggingin gildir fyrir það tímabil sem tilgreint er í vátryggingarskírteini eða iðgjaldskvittun. Þegar tímabilinu lýkur framlengist vátryggingin um eitt ár í senn nema vátryggingartaki hafi sagt henni upp innan mánaðar frá því að félagið sendi tilkynningu um gjalddaga hins nýja tímabils samkvæmt gr. 22.1. Ekki er þó skylt að tilkynna uppsögn fyrr en tvær vikur eru til loka tímabilsins.
- 21.2 Nú hefur vátryggingaratburður orðið, sem leitt hefur til alvarlegs trúnaðarbrests milli félagsins og vátryggingartaka, eða áhættumat, sem er til grundvallar vátryggingunni og iðgjald miðast við, hefur gerbreyst, er félaginu þá heimilt að segja tryggingunni upp með tveggja mánaða fyrirvara. Verði þrjú bótaskyld tjón á 18 mánaða tímabili hefur félagið rétt til þess að segja vátryggingunni upp. Skrifleg



210 Ábyrgðartrygging einstaklinga

VÁTRYGGINGARSKILMÁLAR

uppsögn skal fara fram án ástæðulauss dráttar eftir að félaginu varð kunnugt um atvik sem veita því rétt til uppsagnar. Félaginu er skylt að endurgreiða hlutfallslega iðgjald fyrir þann tíma sem eftir er af vátryggingartímabilinu.

22. Greiðsla iðgjalds.

- 22.1 Greiða skal fyrsta iðgjald þegar vátryggingin gengur í gildi og síðari iðgjöld á tilgreindum gjalddögum. Félagið sendir vátryggingartaka tilkynningu um greiðslu iðgjaldsins. Í tilkynningunni skal greiðslufrestur tilgreindur sérstaklega sem skal vera einn mánuður hið skemmsta frá þeim degi sem tilkynningin er send.
- 22.2 Sé iðgjald ekki greitt þegar greiðslufresti lýkur samkvæmt 1. mgr. (málgrein) er félaginu heimilt að senda sérstaka aðvörun þar sem greiðslu er krafist innan 14 daga ella fellur vátryggingin niður sé iðgjaldið þá enn ógreitt.
- 22.3 Hafi vátryggingartaki ekki samið sérstaklega við félagið um greiðslu iðgjaldsins áður en frestur samkvæmt 2. mgr. rennur út telst það ógreitt, ef það er ekki að fullu greitt þegar fresturinn er úti.
- 22.4 Krafa um greiðslu iðgjalds er send á heimilisfang vátryggingartaka sem tilgreint er í þjóðskrá nema hann hafi tilgreint annað heimilisfang sérstaklega. Breytingar á tilgreindu heimilisfangi skal þegar í stað tilkynna félaginu.
- 22.5 Falli vátrygging niður samkvæmt 2. mgr. skal vátryggingartaki engu að síður greiða iðgjald fyrir það tímabil sem vátryggingin var í gildi. Reiknast þá iðgjaldið sem um skammtímatryggingu hafi verið að ræða.
- 22.6 Við innheimtu iðgjalds er félaginu heimilt að innheimta sérstakt gjald, sem nánar skal tilgreint í iðgjaldaskrá til að standa straum af kostnaði við innheimtu iðgjaldsins. Þess skal einnig getið sérstaklega í tilkynningu um greiðslu iðgjaldsins.

MEDFERÐ ÁGREININGSMÁLA OG FLEIRA.

23. Meðferð ágreiningsmála og varnarþing.

- 23.1 Að öðru leyti en kveðið er á um í skilmálum þessum, vátryggingarskírteini eða öðrum gögnum, sem vátryggingarsamningurinn byggir á, gilda um hann lög nr. 30/2004 um vátryggingarsamninga.
- 23.2 Ágreiningi varðandi vátryggingarsamning og bótaskyldu félagsins að öðru leyti má skjóta til úrskurðarnefndar í vátryggingamálum. Upplýsingar um nefndina og starfshætti hennar má fá hjá félaginu.
- 23.3 Þrátt fyrir úrræði 2. mgr. er aðilum heimilt að leggja ágreininginn fyrir dómstóla. Slík mál, svo og önnur mál sem rísa út af vátryggingu þessari, skulu rekin fyrir Héraðsdómi Reykjavíkur. Félaginu er þó einnig heimilt að höfða mál út af vátryggingunni á heimilisvarnarþingi vátryggingartaka.
- 23.4 Heimili félagsins og varnarþing er í Reykjavík.

Skráning í tjonagrunn Creditinfo Lánstrausts hf.

Tjón sem tilkynnt eru til vátryggingafélaga eru skráð í sérstakan tjonagrunn sem rekinn er af Creditinfo Lánstrausts hf. samkvæmt samningi við Samtök fjármálafyrirtækja (SFF) sem félagið á aðild að og samkvæmt heimild Persónuverndar. Félagið telst ábyrgðaraðili í skilningi persónuverndarlaga nr. 90/2018 vegna skráningar þess á upplýsingum í grunninn og uppflettingum sem framkvæmdar eru á vegum þess. Tilgangur með skráningu í tjonagrunninn er að stemma stigu við vátryggingarsvikum og ofgreiðslu vátryggingabóta. Skráðar eru upplýsingar um kennitölu tjonpola, tjonsnúmer, tegund vátryggingar og tjóns, dagsetning tjóns og skráningar, staðsetning tjóns og eftir atvikum einkvæmt númer hins vátryggða, s.s. skráningarnúmer ökutækis. Við skráningu tjóns fær félagið yfirlit yfir öll tjón sem tjonpoli hefur tilkynnt óháð félagi og skráð hafa verið í tjonagrunninn. Eingöngu starfsmenn félagsins sem skrá tjón og vinna að tjónauppgjöri hafa aðgang að tjonagrunninum. Upplýsingum skal eytt úr tjonagrunni þegar þeirra gerist ekki lengur þörf í þágu tilgangs vinnslunnar, í síðasta lagi þegar 10 ár eru frá skráningu upplýsinganna.

Skilmálar þessir gilda frá 15. janúar 2019.